

## REGIONAL NEWS

HEADLINES:-

1. ZPM sorkarin kuthnathawktute tharchhuah sawhthing an leina man an pe tla tawh tih vawiin khan ZPM Party chuan thuchhuah siamin a sawi.
2. Assam Rifles ram chhuahsan hman dan tur reltu Advisory Committee invitee atangin Centre for Environment and Social Justice (CESJ) an inhnukdaw.
3. Nitin inhlawhfate humhalhna tura Sorkar laipuiin dan thar a siam, Labour Code chu Mizoram-ah pawh hmantheih tura ruahmanna kalpui mek a ni.
4. Khawchin thlirlawktu Indian Meteorological Department (IMD) chuan kumin thlasik chu kum dang aia a vawt deuh tura rin a ni a ti.

&lt;&gt;&lt;&gt;&lt;&gt;

GINGER

Chief Minister Pu Lalduhoma kaihhruai ZPM sorkarin a lo intiam tawh ang ngéiin, kuthnathawktute tharchhuah sawhthing an leina man an pe tawh tih vawiin khan ZPM Party chuan thuchhuah siamin a sawi.

An thuchhuaha an tarlan danin, Mizoram puma sawhthing an lei zawng zawng Kg nuai 3 sing 3 & 8,350 chu Kg-ah Cheng 50 in an lei a, hemi atana senso cheng Vaibelchhe 137.72 chu mipuiah pek kim vek a ni tawh a ni.

Hetihlai hian kumthar 2026 February thla atangin sawhthing hi a lei chhunzawm leh dawn a, Kum tharah pawh sorkarin sawhthing hi 'price support' a la pe chhunzawm zel dawn baw.

ZPM thuchhuah chuan Agriculture Minister Pu PC Vanlalruata'n Kg. 1 cheng 50 aia hniama hralh te tân lungngaihna tur a awm lo nia a sawi chu mipui tana ding reng sorkar an nei tih a tarlang a, Sawhthing lei chungchanga lungawi lo te an awmin, an tana vuivaina District Agriculture Marketing Committee (DAMC)-ah thlen theih a nih thu Agriculture Minister in sawi pawh langtlang leh mipui sorkar a nihzia tilangtu a ni an ti.

&lt;&gt;&lt;&gt;&lt;&gt;

GOVERNOR

Sawrkar laipui Ministry of Information & Broadcasting buatsaiha Sawrkar project hrang hrangte zirchiang tura Assam leh Mizoram tlawha rawn zin, PIB Cochin Press Tour Team ten vawiin khan Larsap General (Retd) Vijay Kumar Singh chu Raj Bhavan-ah hmuin an kawm.

Larsap chuan tunhnaia Mizorama hmasawna project kalpui tlangpuite tarlangin, Km 51.38 a thui Bairabi-Sairang New Railway Line hawn tak chu danglamna thlentu pawimawh tak a ni a, hei hian hmuh theihin khualzin a hipa, inkalpawhna leh bungraw phurh a tih awlsam avangin zinna senso leh thil man pawh a tlak hniam phah a ni, a ti a. He railway hi Kaladan Multi-Modal Transit Transport Project (KMMTTP) nena thlunzawm tura ruahman a nih thu leh Km 200 chuang hmabak la awm pawh tluang taka zawhfel a beisei thu a sawi baw.

Larsap chuan Sawrkar laipui leh State Sawrkarin hmasawna project pawimawh tak tak an siam mek zel tih sawiin, nakin lawkah chuan

Mizoramah hmasawna ruhrel tam zawk hmuh tur a awm dawn thu a sawi bawk.

Member 13 telna Press Tour Team-te hian an cham chungga Mizoram an hmuh dante leh hmasawn zel tura pawimawh nia an hriatte Larsap an sawipui a. Traffic dan tha taka zawm a ni leh mipui khawsak phungte bakah hmeichhiate'n khawtlanga hmun pawimawh tak an chang chu entawntlak an tih thu an sawi bawk.

<><><>

### PARTY PR

Lai Autonomous District Council MNF Party Inthlanpuia Campaign Chairman Pu Lalchhandama Ralte MLACHUAN, LADC Inthlanpui ah Party malin MNF chuan Sorkar an siam a beisei thu a sawi.

Vawiin khan Lawngtlai Press Club ah Thuthar thehdarhtute kawmin, LADC Inthlanpui hmachhawn mek ah MNF chuan Party a rinawm hlang Candidate an neih vangin mipuiin MNF Party ah rinna an nghat tih sawiin, Term kallai ah Sorkar nasa taka buai karah pawh MNF chuan MDC rinawm tak mi 11 a nei a ti a, MNF in Sorkar na an chan theih chuan LADC ah Sorkar mumal zawka a kaltheih nan Anti Defection Law chu a theih ang anga neihdan ngaihtuah a ni ang a ti.

ZPM Sorkar chu hnam hnufual zawkte ngaihthah ah puhin Pu Lalchhandama Ralte chuan LADC hnuaia thawkte hlawh pawh hrek duh Sorkar ah ZPM chu puhin, Autonomous District Council pathum huamchhunga an MLA neihchhun pawh Sorkar ah awmzenei theilova siamtu an ni a ti.

Pu Lalchhandama Ralte chuan FCAA 2023 chu a tuar nasa ber tur chu ramri depa awm Autonomous District Council te an ni tih sawiin, ZPM Sorkar in he dan hman a remtih tawh do na chu chhonzawm zel a ni dawn a, LADC ah Sorkarna an chan theih chuan District Council tha chakna hmang pawn theihtawp chhuahzui a ni ang a ti.

Pu Lalchhandama Ralte hi Tuirial bialtu MLA Pu K.Laldawngliana leh Ex-MLA Pu H.Biakzaua ten an tawiawm a ni.

Hetihlai hian, ZPM Adviser pahnih- Pu Lalnghinglova Hmar leh Dr. Lorrain Lalpekliana Chinzah te chuan campaign in Lawngtlai E bial an fang a. Sangau leh Lungzarhtum inkar MDC bial pakuaa khaw hrang hrang tlawh kualin mipuite leh Unit hruaitute an kawm a, Lai Autonomous District Council-ah ZPM sorkar ngel nghet tak a din theih nan Tuichhak mipuite lungrual taka ke penho turin an sawm a. MDC inthlan lo awm turah candidate an thlan chhuahte chu party mi zawng zawngte lungrualna leh duhthusam a ni vek lo tih sawiin, hotute remruat ang pawm tlang a, lungrual taka kalho turin an sawm a ni.

<><><>

### MPCC

MPCC PAC Member Pu Joseph Lalhimpuia MLA hlui chuan Samagra hnathawktute hlawh cheng nuai 400 dawn lai sorkarin a cut sak chuan Dan behchhan mumal a neilo a ti.

Congress Party chuan Congress Bhavan-a Political Session an hmannaah he thu hi sawiin Pu Joseph Lalhimpuia chuan Centrally Sponsored Scheme (CSS) hnuaia thawkten sawrkar intiam anga dah ngheh phut a an nawrh avang khan Education Deptt. hnuai Samagra-a thawktu 5000 dawn lai ni 7 hlawh cheng nuai 400 vel zet chu Order engmah awm loin hren sak an ni a ti a, Samagra hnuaia thawk zingah hian Mamit District-a awmte chu hren sak an ni ve lo a. He tih lai hian CSS Employee nei

sawrkar Department dang tumahin hlawh an cut sak lo thung a ti. Hlawh awm tawh sa, mahni Deptt. a mite cut sak chu a hriatthiam loh thu leh kalphung thar ni a a rin thu a sawi a ni.

ZPM ten inthlan lain vote an duh avangin CSS te dahngheh an tiam a. Council of Minister Meeting June, 2024 ah pawh 'The Government of Mizoram Regularization of Centrally Sponsored Scheme (CSS) Employees Scheme, 2024 pawmin kum 10 service tawhho dahngheh an pawm a. Mahse, tunah chuan chhuanlam siamin a pawhtlai dan an zawng mek a. Hetihlai hian SSA Association in High Court a a khinnaah hnehna changin sorkar hmalakna an nghak mek bawk a. Hei mai hi ni lovin Sorkar hnathawk MPSC kaltlanga lutte pawh sorkar in an service a pawmsak tawh bawk a, chuvangin an intiam ang hian CSS te chu dahnghet thuai turin an phut a ti.

<><><>

### CESJ

Assam Rifles ram chhuahsan hman dan tur reltu Advisory Committee thutlukna siam danah an ngaih a that loh avangin Centre for Environment and Social Justice (CESJ) chuan committee invitee an nihna atangin an inhnukdawk tih an sawi.

Vawiina CESJ hruaituten Aizawl press club a thuthar thehdarhtute an kawmna ah CESJ Treasurer Pi Saizampuii Sailo chuan Advisory Committee meeting thutlukna siam danah CESJ aiawha tel thinte an ngaih a tha lo tih a sawi a, Advisory Committee-a Invitees anga an tel zel chuan, Sawkarin AR chhuahsan ram, a duh ang anga hman remtih puitu atan chauh an tel ve nia a lan dawn avangin an pawl tan tel ve zel chi nia an hriat loh thu a sawi.

AR chhuahsan ram chu mipui len vahna thengthaw nuam leh boruak thianghlim petu atana zuah an duh avangin Laldenga Cultural Centre sak tum pawh cancel turin an lo ngen tawh thu a sawi a, tuna Convention Centre sak tura thutlukna siam a ni leh chu tha an tih loh thu leh Advisory Committee chu mipui duhdan emaw, environment tana tha tur lam aiin, sorkar duhdan leh ruahmanna tipuitlingtu atana hmanrua mai nia an hriat avangin inhnukdawhna lehkha Chief Minister hnenah an thehltut tih a sawi a ni.

<><><>

### AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

### NEWS

Akashvani Aizawl Regional News Unit in Aizawl Hnahthial, Chawngte, Vairengte leh Champhai North atana Part Time Correspondent a lak tur te interview chu Dec ni 3 khian neih a ni dawn a, diltute chu Dec ni 3 chawhma dar 10.30 ah document kimchang nen Office ah thlen kim tur a ni.

<><><>

## LABOUR CODE

Ramchhunga nitin inhlawhfate tana Sorkar laipuiin an dikna leh chanvo a pekna dan thar Labour Code thar chu Mizoram-ah pawh hmantheih tura ruahmanna kalpui mek a ni a, he dan thar hian hlawn chi hrang hranga hnathawk te dinhmun tha zawka a hlankai beisei a ni.

He dan thar hian kum tam tak lo hman tawh labour law hlui chu awlsam leh huapzo zawkin a rawn siam dawn a, Sawrkarin labour code thar hman tura a tihte hi Code on Wages, 2019, Industrial Relations Code, 2020, Code on Social Security, 2020 leh Occupational Safety, Health and Working Conditions Code, 2020 te an ni a, Central Sorkar chuan a chanpual bik a pehfel thawkhat tawh a, State in a chanpual her danglam tura a ngaihpawimawhte State rules siam tur chin a tih pawh tunah hian Mizoram Sorkar chuan pass theih tura buaipui mek a ni.

Mizorama Labour Employment, Skill Development and Entrepreneurship Department (LESDE) Director Pu John Tanpuia chuan a ram pum huapin hnathawktu tam zawkin he dan thar hi an thatpui a rin thu a sawi a, India sorkar chuan kum 2047 ah India chu Economy-ah a thang chak ber ni thei turin hmathlir a nei a, chumi atan chuan he Labour Code thar hia pawimawh ber anih loh pawhin a pawimawh ber te zing a mi nia a hriat thu a sawi a, Mizoramah pawh hmathlir nei ran a, he dan hian a huam theih tur hnathawkte an lo thahnem zel a, Labour Code in heng hamthatna a rawn chhawpchuah ah hian te hian tel ve thei turin Mizoramah pawh sorkar hna ringawt ngaihtuah lova Industry lam hawi a ngaihtuahna siam a hun tawh hle a ti a, hetiang lam hawi a kal a, tuna labour code incentive kalpui tan tur hi beisei phakbak leh hriatthiam phak bakin hnathawk te hum a tum a, hlawk taka hna thawh a nih theih nan Mizo mipui ten ngaihtuahna thar an sen a ngai tih a sawi a ni.

<><><>

## WEATHER

Khawchin thlirlawktu India Meteorological Department (IMD) chuan kumin thlasik chu kum dang aia a vawt deuh tura ngaih a ni a ti/ Hetihlai hian tun dinhmunah chuan boruak a la hniam em em hran lova, vawiin khan a lum lai berin celsius degree 21.4 leh a vawh lai berin celsius degree 18.2 a ni a, tun atanga darkar 120 chung hian Mizoram chungah a vawh lai berin celsius degree 12 atanga celsius degree 14 -a a tlak rin a ni a, hei hi Mizoram District hrang hrangah khaw awm dan tura rin a ni a, Lawngtlai leh hmun thenkhatah temperature hi hmun dang aia a vawh rin a ni.

India Meteorological Department Director Sudheer Kumar Dwivedi chuan Mizoramah thlasik laiin a vawh lai berin celsius degree 8 aia hniam a la tawng lova, kumin-ah erawh hei hei aia vawt hi a tawn theih rin a ni a ti.

<><><>

## MANN KI BAAT

Prime Minister Narendra Modi chuan November ni 30 (Pathianni) hian Akashvani-a 'Mann Ki Baat' programme ah ram chung leh pawna cheng mipuite hnenah thuchah a sawi dawn.

Prime Minister hian chawhma dar 11 ah thuchah sawi tanin he hun hi thla tina neih thin radio programme vawi 128-na tur a ni. He hun hi Akashvani leh Doordarshan network zawng zawng, AIR News website leh Newsonair mobile app-ah te pek chhuah a ni dawn bakah AIR News,

**DD News, PMO, leh Ministry of Information and Broadcasting te YouTube channel-ah te pawh live-a pek chhuah a ni dawn bawk. Hindi-a pek chhuah a nih zawh veleh hian Akashvani chuan tualchhung tawng hrang hrangin a pe chhuak zui nghal dawn a ni.**

<><><>